

Naartunermi, erninermi meeravissiarataarnermilu sulinngiffeqartarneq pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19-ini, siornatigut suliffigisimasaq apeqqutaatinnagu ullormusiaqarnissaasa pisinnaatitaaffigilernissaannut, Inatsisartut inatsisaasa allanngortinnissaanut Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens NapätôK', Naleraq)

pillugu

Ilaqutariinnermut Peqqissutsimullu Ataatsimiititaliap

siunnersuutip aappassaaneerpeqarnerannut

ISUMALIUTISSIISSUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Pipaluk Olsen, Demokraatit, siulittaasoq

Inatsisartunut ilaasortaq Aki-Matilda Høegh-Dam, Naleraq, siulittaasup tullia

Inatsisartunut ilaasortaq Bo Martinsen, Demokraatit

Inatsisartunut ilaasortaq Paarma Lund Kreutzmann, Inuit Ataqaatigiit

Inatsisartunut ilaasortaq Bentiaraq Ottosen, Atassut

UPA2026-imi majip sisamaani siullermeerinerup kingorna siunnersuut ataatsimiititaliap misissorpaa.

Siunnersuutip imarisaa siunertaalu

Erninermi, naartunermi meeravissiarataarnermilu sulinngiffeqartarneq pillugu Inatsisartut inatsisaata Naalackersuisunit allanngortinneqassasoq siunnersuuteqartup kissaatigaa, erninermi sulinngiffeqarneq sioqqullugu arnat isertitarisarsimasaat apeqqutaatinngikkaluarlugit sapaatip akunneranut 40 tiiminut tamanut nalimmassarneratigut, siunertarineqarporlu naligiinnerulersitsineq.

Erninermi ullormusiat tiimikkaarlugit naatsorsorneqartarput, tiimimullu akigitinneqartoq Naalackersuisunit ukiut tamaasa aalajangersarneqartarluni.

Sulinngiffeqarnerup aallartinnginnerani arnat isertitaat atorfeqarnerminnilu atugassarititaasunut atatillugu tiimit naatsorsorneqartarput, arnarlu aalajangersimasumik isertitaqanngitsoq sapaatip akunneranut 14 tiiminik erninermi atatillugu sulinngiffeqarnermi ullormusiaqartinneqartarluni, arnamullu piffissaq tamakkerlugu sulisartumut sapaatip akunneranut 40 tiiminik erninermi ullormusiaqartinneqartarluni.

Siunnersuutip Inatsisartuni siullermeerneqarnera

Siullermeerinninnermi Naalakkersuisut ima allannguutissatut siunnersuuteqarput:

” siunnersuutigerusuppavut: Naartunermut, erninermut meeravissiartaarnermullu atatillugu sulinngiffeqarnissamat tunniunneqarsimasumut atugassarititaasut, aningaasaqarnikkut atugassarititaasut ilanngullugit, pitsannngorsarnissaannut inatsisilerinikkut aningaasaqarnikkullu periarfissanik 2026-imi naammassisussamik Naalakkersuisut misissuillutik aallartitsinissaannik peqquneqassasut pillugu Inatsisartut aalajangiiffigisassaattut siunnersuut. Erninermut atatillugu sulinngiffeqartarnermut inatsisip atuuttup kukkunersiorneqarnissaa alloriarneq tulliusasooq siunertaralugu misissuineq UKA 2027-imi naammassineqassaaq.”

Naalakkersuisut allannguutissatut siunnersuutaat, siunnersuutillu ataatsimiititaliami suliarineqartussatut innersuussutigineqarnissaa partiinit arlalinnit taparserneqarpoq. Misissuinerup naammassineqarnissaa UPA2027-mut allanngortinneqassasooq ataatsimiititaliamut parti ataatsimit kaammattuutigineqarpoq.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq siunnersuutip piviusunngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut.

Ataatsimiititaliap maluginiarpaa, siunnersuummi aningaasatigut kingunerisassaasa nalunaarsorneqarnera naapertuuttoq imaapporlu, siunnersutigineqartup piviusunngortinneqarnerani erninermi ullormusiat ukiumut katillugit 30-35 mio. kr.-inik aningaasartuutaanerulissapput.

Iisimatitsiffiusumik ataatsimeeqatigiinneq

Ulloq 15. maj ingerlanneqartumi ilisimatitsiffiusumik ataatsimeeqatigiinnissamat Isumaginninnermut, Suliffeqarnermut, Ineqarnermut, Attaveqaatersuutininut Isorliunerusunullu Naalakkersuisooq ataatsimiititaliamit aggersarneqarpoq. Ataatsimiititaliap apeqquteqaatai

Naalackersuisullu apeqqutigineqartunut allakkatigut akissuteqaataat isumaliutissiisummut ilanngussaq 1-tut ilanngunneqarpoq.

Ataatsimiititaliap siunnersuummut oqaaseqaatai

Qanoq tunuliaqutaqarneq apeqqutaatinnagu ilaqutariittut inuuneqarnerup pitsaasumik aallarnerneqarnissaa qulakkeerneqartariaqartoq meeqqallu aallaqqaaterpiaaniit toqqissiffiusumik angerlarsimaffeqassasut, ataatsimut isigalugu isumaqatigineqartoq. Aammattaaq angajoqqaat atugarisaat assigiinnikkaluartut, meeqqat tamarmik assigiimmik naleqarnerat assigiinnillu pisinnaatitaaffeqarnerat politikkikkut isumaqatigiiffiusoq ataatsimiititaliamit maluginiarneqarpoq.

Arnat erninermi ullormusiaat allanngorartuusut ataasiakkaallu atugaat apeqqutaasartut ataatsimiititaliamit maluginiarneqarpoq, tassa erninermi ullormusiat pissutsit arlallit aallaavigalugit naatsorsorneqartarmata, matumani ilanngullugu arnaq suliffeqarnersoq, namminersorluni inuussutissarsiuteqarnersoq, ilinniarnernik ingerlataqarnersoq, arnap erninissani sioqqullugu isertitarisartagai aamma arnap erninermut atatillugu sulinngiffeqarnermini aningaasarsiaqarnissaminut pisinnaatitaanersoq.

Arnat erninissaq sioqqullugu erninermilu sulinngiffeqarnerup nalaani inuiaqatigiinni aningaasaqarnerat pillugit paasissutissaqanngitsoq misissuisoqarsimanngitsorlu, tassungalu ilanngullugu katisimallugu aapparisaq inooqatigisarluunniit piniartuunersoq, suliffeqarnersoq, imaluunniit arnaq kisimiittutut pilersuisuunersoq pillugit paasissutissat amigaataasut ataatsimiititaliap aamma maluginiarpa. Arnat akornanni ilaqutaqalernermikkut naligiinnginneq qanoq annertutiginersoq ersarissumik ilisimaneqanngilaq. Taamaattumik naartunermi sulinngiffeqarnermut atatillugu arnat atugaat pillugit misissuineq ilisimasaqarnerulersitseqataasinnaavoq.

Kalaallit Nunaanni arnat immikkut ittumik atugassaqtartinneqartut ataatsimiititaliamit aamma maluginiarneqarpoq, tassa erniartorlutik angalasariaqartaramik. Pisut ilaanni katisimallugu aapparisaq inooqatigisarluunniit tapersersortiginagu arnaq kisimiilluni angalasarpoq. Akerlianik arnaq illoqarfimmi najukkamini ernisoq erninissaq sioqqullugu, erninermi ernereernerullu kingorna ilaqtaminik qanigisaminik avatangiiseqartarpoq. Atugassarititaasut taamaattut unamminarsinnaapput, arnanut erniartorlutik angalasunut isumaalulernermik nassataqarsinnaasut.

Ataatsimiititaliamit maluginiarneqarpoq, Nunani Avannarlerni allani ataataasup imaluunniit anaanaaqataasut erninermi sulinngiffeqartarnerat sivitsorneqarsinnaanera pingaartinneqartartoq, meeqqap angajoqqaaminit najorneqarnissaa atassuteqarnissaalu pingaaruteqarnera pissutigalugit. Taamaattumik, ataataasut sivilisinerusumik sulinngiffeqartarnissaannik kajumilersitsisussamik, angajoqqaallu akunnerminni

sulinngiffeqarnissap avissinnaanissaanut periarfissinneqarnissaat angujumallugu erninermi sulinnigiffeqartarneq aaqqissuussineq pisarpoq. Tamanna angajoqqaat naligiimmik sulinnigiffeqarsinnaatitaanerat taparserneqartarpoq, ungasinnerusorlu isigalugu ilaqtariinnut nukittorsaataassalluni.

Ataatsimiititaliap inassuteqaatai

- Ataatsimiititaliap isumaqatigiittoq allannguutissatut siunnersuut tulliuuttoq akuerisassanngorlugu inassuteqaatigaat:

“Angajoqqaat sulinikkut isertitaqarnikkullu atugarisaat apeqqutaatinnagit, meerartaarnermi ullormusiaqarnissamut periarfissat pitsanngorsarneqarnissaat anguniarlugu, iluserititassanik minnerpaamik pingasunik Naalakkersuisut saqqummiussinissaannik Inatsisartut aalajangiiffigisassaattut siunnersuut.

Iluserititassani minnerpaamik ataatsimi ilanngunneqassaaq erninermi ullormusiat minnerpaaffiata qaffanneqarnissaa. Iluserititassatut saqqummiussat tamarmik inatsisilerinikkut, aningaasaqarnikkut, allaffissornikkullu kingunerisassa at ilanngunneqassapput. Meerartaarnermi sulinnigiffeqartarnermut inatsisip atuuttup kingusinnerpaamik UKA2027-mi nutartserneqarnissaa siunertarlugu, iluserititassat minnerpaamik pingasut 2026-ip naannginnerani saqqummiunneqareersimassapput.”

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Pipaluk Olsen
Siulittaasoq

Aki-Matilda Høegh-Dam
Siulittaasup tullia

Bo Martinsen

Paarma Lund Kreutzmann

Bentiaraq Ottosen